

少師朱襄毅公督蜀疏草

少師朱襄毅公督蜀疏草卷之

掃蕩獻俘疏

欽差總督四川兼制湖廣荆岳鄖襄四府陝西漢中一
府軍務策應緩急督理糧餉兼巡撫四川等處地方兵
部左侍郎兼都察院右僉都御史臣朱燮元謹題爲廓
清蘭土生擒逆黨得獲印信夸器循例解獻以彰天討
事蘭酋作逆經今三載解圍復渝已經俘獻外嗣後賊
倚藉鄰存恣肆跳梁東衝西突日無寧晷仰藉皇上威

靈閣部籌畫文武諸將吏黽勉從事業已攻取永寧掃
清巢穴散各奪合縱之勢開洪荒未取之區蓋捷伐克
嫺於中興而展闢有光於前烈矣自天啓二年九月至
天啓四年二月陸續據監軍紀功叅政閔夢得吳國仕
王世仁副使李仙品徐如珂謝渭侯國僉事劉可訓段
師文胡平表盧安世知府鄭朝棟總兵李維新各塘報
據叅將林兆鼎范繼道秦翼明羅乾象劉養鯤秦拱明
鄧懋官張邦紘侯良柱守備李必茂等大小血戰百有
餘場當陣生擒僞都督元帥崇明親枝堂兄奢崇輝奢

史都長經歷矮老虎崇明妻安氏僞經畧李遠達蔡金
貴妖首張尚義等斬獲水西僞大都督魯仲賢等首級
及永寧宣撫司與各衛所印信并違制奪衣甲器物僞
造印信關防前來俱發按察司監收覆驗審明開報到
臣該臣會同巡撫湖廣提督軍務都察院右副都御史
薛貞巡撫陝西贊理軍務都察院右僉都御史孫居相
提督軍務撫治鄖陽都察院右副都御史蔡復一查看
得各犯或係親枝爪牙或係四外亡命糾連構煽共創
僭元改號之謀屠戮焚燒不顧血海骸丘之慘罪在不

赦法當俘獻若候擒獲二酋併解多至瘐死何以正法
除汪澤遠王有貴駱文奇等一十七名俱係僞授總副
叅遊等逆犯與酋之綉女么妹賊婦王氏等八口逆犯
張彤母女幼子途遙難以盡解檄行司道再加覆審就
近正法發落各據申報監故曾謨七等一百八名俱徑
行戮屍懸示外崇明嫡妻安氏堂兄奢崇輝俱於解到
三日前後相繼身故查安氏苦勸夫子保全多命旣被
剗死合免起解至崇輝曾授僞都督逆寅呼爲皇伯圍
城殺人罪大惡極今雖速斃仍憲判屍梟首傳示九邊

以爲不忠者律所有生擒崇明親枝僞都督僞經畧軍
師元帥僞總兵奢史都長經歷李遠達等二十五名如
法肘鎖差叙州府同知翟文簡守備武聲華指揮魯希
聖加銜守備百戶蔣繼祖押解闕下及將得獲印信刀
甲器鞍轡僞印等物固封併交本官隨本進繳伏乞
勅下兵部議覆其器械印信并僞印僞勅曆日劄付等
件付內庫交收奢史都長經歷李遠達等行法司會審
覆請正法汪澤遠等容臣會同巡按四川監察御史會
審就近發落徑自具奏其西目魯仲賢羅奇蘭賊夏景

雲章守謂等首級仍應剉碎用示反叛之戒爲此具本
開坐謹題請旨

計開

一逆酋至親心腹首惡三名

奢史都係崇明親枝授僞總兵酋每出兵本
犯必前鋒拒敵殺人如麻業經生擒自應
正法

長經歷苗名阿枝係崇明新枝授僞都督酋
方敗遁尤爲代出死力撲殺官兵惡甚豺

狼律應碎磔

矮老虎宣撫司人與阿枝同惡相濟嗜殺不休酋之貼身羽翼也

一投賊助逆授偽都督經略元帥四名

李遠達又名李達原名鄧漢傑係江津縣生員被黜投充漢把先因撥置土司爭襲繫獄一十三年後被倖脫卽投奢酋代爲盡力窺竄逆謀獻封刀反計加封偽經畧及敗走龍場結連水西時出時沒皆本犯之

謀大兵會集順目王繼宗糾衆內應本犯
又泄其謀致酋父子走脫允爲倡亂之魁
應正凌遲之法

蔡金貴係仁懷縣人播平授冠帶把總見酋
叛亂指稱本縣原是苗地投獻與酋僞授
中軍都督之職屠戮生命不啻刈草及王
繼宗等舉事又復傳信二酋致令走脫罪
大惡極宜正典刑

王承勳係宣撫司人卽王承恩酋拜爲僞都

督與二酋貼身用事所過殘滅酋號虎癡
其兇可見

周邦大係湖廣興國州人假官擬辟具訴領
兵至資縣唐明渡首先降賊縛縣官攻
圍省城敗歸永寧授偽總兵晝夜畫策作
賊先鋒允稱大逆宜加上刑

一白蓮妖首僞軍師一名

張尚義卽劉明選係羅江縣學生員以白蓮
妖術煽惑三巴僞號僭元糾合萬餘衆攻

圍綿州當爲官兵殺敗逃至永寧更名李
天樞投酋父子獻龍華國寶印一顆授僞
軍師誘攻省城登壇演法官兵攻永當陣
生擒三川素受其毒萬磔庶酬其辜

一賊心腹謀士領兵僞將一十七名

徐應龍係瀘州人授僞叅將當二賊圍省時
把守龍泉隘口代爲轉輸姦淫殺掠不可
枚舉敗後每陣常先官兵攻永追獲萬衆
切齒寸斬爲快

孟啓鄒卽李楫係銅梁縣人樊龍占渝三日
後卽用禮聘取僞授監軍攻打大足銅梁
等縣無處不到爲寅賊親信加僞都督元
帥龍透大戰本犯躍馬當先陣上生擒法
無可貸

馮盛宗係永寧衛生員奢賊授以僞給事中
職銜首妻安氏生日逆寅議上伊母綴號
同僞節度使張向極作表文語語無將自
作之孽何可逃死

許添祿係永寧中所軍隨破重慶入攻省城
授僞副總兵其屠戮生靈慘不可言且與
奢寅時刻相隨惡黨爲最

何天錫係永寧人附賊謀反封爲氣脉僞職
樊龍張彤之變二逆差本犯入渝授以密
計遂因而舉事在永一切府事皆由掌握
殺人如戲二逆傾心任之此賊之心腹也

羅亮洪係永寧長官應襲生員首先投附奢
寅統兵攻破富順卽繼孟若愚坐鎮焚劫

極慘

羅友才係永寧人同酋謀反授僞遊擊首先
攘臂攻破瀘州殺人無忌萬家宅舍一火
無餘自應論死以謝衆寃

吳新係永寧人與崇明管班一應塘報諭帖
及發奸細探聽等事皆出其手

劉文係合江縣人酋所募援遼千總同樊龍
反叛屢在重慶解金銀回永寧授僞參將
每陣當先賊之心腹也

錢萬選係富順縣人久住永寧鹽客投賊授
偽叅將攻劫州縣無處不到

張興係宣撫司人崇明心腹管班總頭通城
切齒法網難逃

羅奇舟係永寧內四里人專管奢賊鄒家山
唐帽領二處兵馬又隨攻打瀘納等處放
火劫財罪重莫宥

胡宗榮係宣撫司人賊之衝鋒民之獍獍天
網不漏碎磔何辭

田有金係赤木驛驛吏授偽總兵二逆收歸
誅求苛歛本犯又投奢富作旗鼓攻省劫
州縣擄掠婦女無筭轉賣鎮雄流毒頗多
按法難宥

孔聞過卽孔文谷係江西撫州府臨川縣人
慣在永寧貿易附賊謀逆授偽兵科給事
中每作書啓通各苗借兵時進密計爲賊
心腹

羅文友卽大老虎係長寧縣人本犯猖獗異

常搏噬無厭獨擅老虎之號允爲佐賊之魁

漆應係永寧衛前所軍僞授叅將爲賊死士一酋至親僞都督元帥首級一顆

奢崇輝酋名者卧係崇明親堂兄酋謀叛全恃本犯之勇初圍省城再戰江門石子九枝每陣當先血戰奢寅呼爲皇伯虎將授僞都督元帥及酋敗遁而崇輝猶挺刃力拒我師被戮者六人當陣生擒

一水西大頭目首級二顆

魯仲賢係水西人授僞都督大元帥聞奔寅
父子兵敗卽糾合莫得普窩等統兵數萬
直衝官莊進蘭州於天啓三年五月十三
日羅乾象督兵鏖戰三晝夜陣斬此水西
第一大頭目

羅奇係水西僞總兵同仲賢統兵援蘭至中
莊被羅乾象率偏將譚懋勳譚大孝等併
力大戰陣斬其首本犯亦西目巨惡也

一黨賊授僞軍師監軍總兵等首級共六顆

夏景雲係永寧衛生員僞拜大將夏永忠之子僞授總監軍道初則住劄資縣殺掠甚於虎狼繼則每陣監督奸狡同於鬼蜮雖經監故法應戮屍

章守謂係浙江會稽縣人先任瀘州衛經歷寄籍納谿縣素曉天文地理刻篆僞璽暗埋賊墓妖言有天子氣慫恿謀反日與奢寅隨營主謀與何若海竝稱相國

胡其杰係永寧衛生員本犯首倡助逆授僞
監軍同攻南溪寅益重用之名列周鼎之
上

張國柱係永寧人授僞總兵職銜同樊龍在
重慶殺黃總兵又同奢寅圍省在北門劊
營賊之驍將屠戮甚慘

沈淋係永寧衛生員投賊授僞操江巡撫把
守永寧晝夜盤詰爲賊效力賊所最親信
者

王道達係九姓長官司生員領兵援遼教場
行兇慘殺多命城復之日本犯隱姓名漏
入散兵投降加銜守備王元第營中安插
真安州元第覺而縛之此與樊龍張彤罪
惡不分伯仲者也

一得獲印信五十一顆

舊四川總兵官關防一顆

永寧宣撫司印信一顆

永寧衛左千戶所百戶印十顆

永寧衛右千戶所百戶印十一顆

永寧衛後千戶所百戶印十顆

永寧衛前千戶所百戶印六顆

永寧衛前千戶所管軍印一顆

永寧衛中千戶所管軍印一顆

永寧衛鎮撫印一顆

赤水衛白撒千戶所管軍印一顆

赤水衛管赤水站百戶印一顆

九姓長官司儒學條記一顆

阿永驛條記一顆

赤水衛前千戶所百戶印三顆

摩尼所百戶印一顆

尋甸府通判關防一顆驗係私用石刻

偽造印信關防共十顆

偽大元帥印二顆

偽操江巡城總兵關防一顆

偽兩浙都轉鹽運使司運使張關防一顆

偽欽差鎮守上川南正總兵關防一顆

偽總督前監軍道關防一顆

偽駐鎮合江監軍道關防一顆

偽順江府條記一顆

偽府營提調關防一顆

偽宣撫司奢關防一顆

偽造勅劄曆日

偽勅二張筒一箇

偽劄四張

偽曆日一本

得獲酋器等物一百二十六件

龍桌一張

銀袞龍椅一把

銷金彩畫龍傘一把

金瓜三隊

三尖兩面刀二把

標纛頂一箇

奢寅馬上使龍槍一枝

逆寅父子自披黑虎古甲一籠上有銀錢四

筒銀攪子二箇

黑虎野豬皮古甲一籠

九龍古甲一籠

金絲紫欄金吞口銀拖泥長刀一把皮帶銀攪子

金鑲銀欄舊沙魚皮長刀一把無拖泥

金鑲沙魚皮金吞口銀拖泥長刀一把皮帶攪子

金鑲銀吞口拖泥嵌銀攪子長刀一把皮

帶

銀鑲左插一把銅攪子皮帶

苗弩四張

苗槍四枝

銀柯梯雕花古鞍一副二龍銀錢金韉屨
鞞 羅木鞞上有嵌銀攪子鹿角後鞞嵌銀鑲

頭計六件

銀包金鑲馬鞍一座銀鞞珠五十六箇銀包
鞞根一件銀鑲鞞一副連鞍共秤重十七

斤四兩共計三件

馬纓槍纓共一袋

龍袍一疋

裝花鳳裙一疋

大紅段織金袞龍綠鑲邊單袍一件

綠花段袞龍績繡補紅鑲邊單袍一件

織金袞龍段面藍裏背心一件

紅段織金袞龍面藍裏背心一件

金女冠一頂同寶右連段裏秤重十七兩八

錢

大紅紬金補女衣一件

元色青紬一件

青花織金單袍一件

紅雲段織金單袍一件

大青段面火裏紅裏裝花鑲邊袍二件

青段面火裏紅裏裝花鑲邊袍一件

蘇官綠段面裝花鑲邊單袍一件

紗綠面裝花鑲邊單袍一件

紫段面綠閃段鑲邊單袍一件

紫段面繡花裝邊單袍一件

大紅雲段面綠鑲邊繡錦單袍一件

火裏焰花紬面插錦紅鑲邊單袍一件

綠閃段黃花面織金補紅鑲邊單袍一件

綠閃紅拱線績繡補面紅鑲邊單袍一件

油綠紡紬織金補紅鑲邊單袍一件

裝花五色段績繡補單袍一件

青綠雲段織金補單袍一件

綠花絹面裝花邊單袍一件

藍閃段面績繡補單袍一件

天青段看花補面紅紫裏紅鑲邊袍一件

綠閃段績繡補單袍一件

紫地銀花段紅鑲邊單袍一件

藍段績繡補單袍一件

紅花段五色鑲補單袍一件

綠素段裝花天青補單袍一件

梅紅細花彭段插錦藍邊袍一件

白錦紬細褶男道袍六件

綠花長續繡補紅邊單袍一件

藍雲長續繡補單袍一件

藍錦刻綵紬刻綵補單袍一件

天青刻綵補單袍一件

織金素長填金補紅邊單袍一件

藍長續繡補單袍一件

織金綠袍續繡面藍紗裏袍一件

藍花紡紬織金補單袍一件

紅素段刻綵補單袍一件

青素段織金補單袍一件

綠花紡紬續繡八寶補單袍一件

綠雲段紅雲段鑲補單袍一件

青素段刻綵補單袍一件

綠花段續繡補單袍一件

藍八角絹面插錦紅鑲邊單袍一件

橫織金面綠絹裏女圓領一件

紅段續繡袖女衫一件

紫倭段面小袖銀花裏男衣一件

紅紵絲織金面藍裏小袖女衣一件

織金紅面大袖女衣一件

藍花紬織繡女衣一件

綠段面裝花藍絲裏背心一件

水紅拱線段面藍裏背心一件

五色裝花面藍裏背心一件

桃紅花段面藍裏背心一件

蒲萄色段面綠閃段裏鑲邊背心一件內鑲

珠金牌鈔一副金梅花十四箇總共十六

件

銀花紡絲紬面紅段裏背心一件

紅素紵絲福絹面藍福絹裏背心一件

純五色裝花面紅紗裏背心一件

大紅段面綠裏裝花梅條背心一件

銀花線紬藍裏背心一件

苗女霞帔一件紅面繡錦鑲邊銀飾件七十

塊墜鈴五十三箇珍珠古老錢一面重二

斤十三兩連衣秤總計一百二十五件

填金紅絹一疋

裝花閃絹一疋

綠素紵絲一疋

紅填金絹一疋

綠閃紅段一疋

桃紅填金段一疋

裝花紅段一疋

填金紅段一疋

裝金綠蜀錦段一疋

織金坐褥面二幅

刻絲單絨裝閃面一件

苗細褶女裙一條

紅段舊女裙一條

白綿紬二長疋二小疋

藍絹女裙一條

銀紅段女裙一條

紅閃色女裙一條

紅段毳邊女裙一條

珍珠攢盒二架連礫秤重五斤一兩

天啓四年四月十一日上奉聖旨

州正給由疏

題爲遵例考覈給由官員事據四川布政使司呈奉臣
批據真安州申准本州知州楊汝昇關稱見年四十歲
浙江寧波府慈谿縣人由舉人萬曆四十二年二月內
除授江西贛州府贛縣知縣本年七月初九日到任四
十六年閏四月內推陞廣東瓊州府崖州知州丁憂未
任泰昌元年十月內復除今職天啓元年二月初一日
到任天啓二年八月內加陞兩淮鹽運使司同知職銜
仍管州事扣該天啓三年十一月三十日連閏實歷俸

三十六箇月三年任滿例應給由照詳奉批仰布政司查報奉此又蒙巡按四川監察溫御史批同前事蒙批布政司查報蒙此行准按察司遵義鹽法等道各咨牒回稱查得本官委於前項年月日期到任歷俸考滿任內徵收錢糧鹽課積貯稻穀五事實政俱已足額修舉貯穀委官盤量無異應准給由開具經薦稱職詞語起送到臣卷查先准吏部咨爲酌議考課之法以肅吏治事內開今後府州縣正官給由免其赴京聽撫按官從公考覈賢否具奏先令就彼復職管事牌冊差人齎繳

其稱職經薦應得誥勅命者昭簡請給其平常不稱職者部院會同酌處又准吏部咨爲酌時宜陳愚見等事內開遇有方面有司官考滿從公考覈據實直書分別稱職平常不稱職三等填註考語具題給由以憑本部議處又准都察院咨爲治平要務急在保民等事內開省直撫按遇郡縣各官考滿總將三六九年修舉過五事實政覈實造冊定稱職平常不稱職之差等另報部院各等因俱題奉欽依移咨通行在卷今據前因該臣會同巡按四川監察御史溫臯謨考覈得真安州知州

加銜兩淮鹽運使司同知仍管州事楊汝昇練能集事
明足燭奸轉輸備殫苦心保障久垂異績本官職業俱
修考居稱職查本官雖加陞兩淮鹽運同知仍在真安
料理是加其級未易其政應准給由報政以俟考覈除
批行令帶俸管事任內行過事蹟徑自造冊差人齎繳
五事冊揭行令咨送部院外理合具題伏乞勅下吏部
將楊汝昇再加考覈酌議題覈施行爲此具本謹題請
旨天啓四年四月十一日上奉聖旨

議留錢糧疏

題爲善後勢必留兵援鄰不能枵腹懇祈聖明俯留年
例起解錢糧再賜發帑以救遐荒事蜀自援遼之役帑
藏盡那復用兵三年公私一洗勉強拮据幸而蘭土廓
清然善後之兵勢不可缺而遵義永寧兩處地界水西
匪獨購奢實以邊安故留兵總共五萬僅僅布置尚覺
不敷臣檄副使謝渭叅議劉可訓僉事盧安世胡平表
與遵義下南叙瀘各道并總兵李維新等酌量地方險
夷首之出沒或修城繕堡以固地方或列燧置烽以防

衝突自黔撫王三善被陷以來雖二賊未敢出犯而警報時傳人情洶洶臣以病軀勉強申飭或不時出哨或懸金用間兵雖守猶戰也川中溝難前後蒙皇上發帑一百六十六萬有奇爲數不少然臣奉命總督以來所得帑金與南京戶部料銀湖廣兌解餉銀合而計之總止三十三萬二千二十五兩而已見經委官盤查計日可以冊報其餘皆那借川中起存正項以供五路之師間月一給罔敢糜濫頃者黔局頓損國威頗傷非大加懲創無以扶體統而服夸方西賊地廣窟深非厚積兵

力無以彰撻伐而擒首惡况諸鄰苗懷同類之悲懼及腹之勢陰施陽設尤費調停今善後之餉久缺援黔之旨新臨當民窮財盡之時決無神運鬼輸之法及查川中各邊自援遼搗藺括借以來欠餉百有餘萬去年十二月松潘諸苗公然燒劫入堡殺人劫財梗道不散戍卒以無糧每每逃去建昌以通滇商苗猥窺伺環聚四十八洞寨屢屢出劫殺官屠卒聲言出犯目下道道不通見在抽兵措餉遣官策應據道路之口多云萬曆四十二年內撫臣吳用先同總兵劉綎等拮据兩年始得

寧息各將士竟不酬叙以致莫肯效死將來光景尤不可測近見樞臣條議令蜀中固守永寧防禦道義且謂各省應解錢糧許借留協濟應用此誠救急良藥臣謹會同巡按四川監察御史溫臯謨合詞上請伏乞皇上洞燭蜀苦軫念危疆兵旣當留食尤難缺餉將天啓四年分加派地畝與應解油漆茶蠟銅錫生絹藥材及協濟陝西黔楚等項銀共三十二萬兩零免行起解專留蜀中權餉遵義永寧見在防守五萬人之口仍祈慨發帑金數十萬兩以便增兵救黔剿賊至於建昌松潘容

臣審勢料理務求杜息夸患救寧邊土其已往鵬剿之功似應查勘以勵後效乞勅戶兵二部速爲覆議上請轉行臣等遵照庶兵得宿飽守則固而援則力西南半壁期保乂安而臣亦無臨渴掘井之苦以早報命矣爲此具本謹題請旨天啓四年四月十一日上奉聖旨

加銜右都謝恩疏

欽差總督四川兼制湖廣荆岳鄖襄四府陝西漢中一
府軍務策應緩急督理糧餉兼巡撫四川等處地方兵
部左侍郎兼都察院右都御史臣朱燮元謹奏爲恭謝
天恩事天啓四年二月初一日准兵部咨爲蘭巢旣搗
等事該浙江道御史張訥題前事本部覆奉聖旨是川
貴搗巢解圍各官勤勞日久功當先叙朱燮元加右都
御史兼兵部左侍郎照舊總督欽此備咨到臣准此臣
具爲叨恩逾分抱病滋深等事疏辭接邸報本年三月

十六日奉聖旨叙功加恩已有成命宜卽祇受不必辭
衾酋尚逋黔復告急還用心料理兵事以副委任該部
知道欽此欽遵臣卽於五月初三日恭設香案望闕五
拜三叩頭謝恩任事訖切念臣賦材疎劣抱病纏綿戎
事婆娑備嘗危險之苦簡書鄭重彌深淵冰之虞邇者
蜀土旣清蘭穴盡掃元兇走險幾同遊釜之魚鄰警忽
聞復作負嵎之獸局轉變而轉大時愈久而愈難如臣
庸愚詎能措置顧量已溢而寵則渚加辭雖懇而情未
獲允秩陪總憲謬叨異數於崇堦職任專征濫荷重權

於外間福旣逾分顛蹶可虞位非其人竦皇特甚臣敢
不勉矢愚鈍圖報涓埃雪耻除兇事必期於完局救焚
拯溺誼更激於同仇謹力疾以拜恩容瀝情而再控臣
無任感激屏營之至爲此具本謹具奏聞天啓四年五
月十三日上奉聖旨

擒治妖教疏

題爲左道惑衆倡亂魁黨旋報就擒謹具疏上聞勅行
嚴治以弭妖氛以杜亂萌事據四川按察司呈問得犯
人一名許其山年五十四歲潼川州民狀招其山與本
州在官民沈真元各不合不務生理專習邪術向未事
露至萬曆四十六年間彼有綿州事犯拏獲監故遊道
熊克真僞造見獲銅木印各一顆遊至龍安府地名白
泥壩投落別巷擬遣吳加成家住宿誘習白蓮邪教比
有另疏獻俘羅江縣生員劉應選卽劉明選聞熊克真

善行邪術卽往吳加成家投拜爲徒從習前教回縣常以術言惑衆隨有綿州今各監故民王時王霞王偉楊梧歐仁舟施白新謝江智童如琴景時朝鄧吉同王霞未獲男王進忠與先在官後審釋僧明正等三十六名口安縣今各監故民周文忠僧政坤正玉洪彩卽羅金堂與先在官今審釋何仕現等二十一名達州今監故民黎好梓潼今監故民魏順羅江今監故民李尚續同劉明選已獲病故妾父范廷智與先在官今審釋何永江等十名利州衛今監故軍洪連李文章未獲洪仕祿

龍安府別卷擬配吳繼宗吳承祿潼川州今監故民張
明清丁真祥姜應策僧通正未獲張庚明等各陸續赴
吳加成家投拜劉明選熊克真門下習學術教德陽縣
今監故民陶廷友陶文脩先在官今審釋陶廷良等四
名今監故木匠郭貴鐵匠高應招各見劉明選等以邪
教惑衆向彼觀看劉明選思本縣近省慮恐事發商謀
移聚吳加成家立會傳教比潼川州已獲監故民方代
亦投拜從習自稱川北領袖回家另立一會鼓惑愚民
比其山與沈真元各不合同監故王自仁劉仕高朱朝

玉胡國儉郭清朝陳可覃加奇僧法禹并先在官今審
釋趙金順等七十六名口各從劉明選爲師騙惑民財
捏造妖書肆倡無忌至泰昌元年十月內劉明選與吳
加成方代要得鼓衆爲亂攻劫州城議定先取綿州次
攻潼川隨商同王時王進忠糾夥政坤正玉羅金堂姜
應策通正等於羅江縣地名白土寺先故范廷仁家僞
造見獲榜文一道并雇郭貴斫造見獲木棒數根又雇
高應招打造鐵釘釘於棒上收存在家至天啓元年閏
二月內密傳方代等誘稱劉明選的係活佛出世俱要

齋戒各出香錢多寡不較的於本月十四日齊至綿州
復覩活佛求免劫難等語傳衆通知劉明選又恐衆人
不服口稱彌勒古佛出世本月十五日寅時動雷百般
鼓衆比其山與沈真元各又不合約聚同行法禹身穿
見獲白綾雙夾衣一件與監故羅仕廣各騎見獲馬一
匹劉仕高騎見獲騾一隻引趙金順陳可等一十三人
隨帶見獲穿用紅藍花綾衣掛一十一件并見獲劍一
把於劉仕高家起行今監故覃加齊騎見獲馬一匹執
見獲刀一把黑漆棍一根與衆置造見獲白綿布旗號

一方各從本家起身齊往綿州聽劉明選鳴鑼掛榜劉明選王時等探得本州李知州公出卽督王偉等於十四日前往洪仕祿家取齊次日同行路由本州地名石馬鎮越臺庵門首經過政坤等口稱明日若果動雷要劫州城等語本庵不在官僧性湛竊聞其言又見政坤等身披紙甲手執白旗忽聽聞李知州回州遂往中途密報李知州隨諭團練指揮馬穀出城巡警是夜擒獲政坤正玉通正三名解州間十五日黎明忽然動雷衆心拱服卽時劉明選督同吳加成王進忠羅金堂姜應

策等張旗掛榜以羅金堂爲頭目身穿大紅圓領手執
大刀與方代等同至城邊見城門緊閉劉明選鼓衆於
城下吶喊至午李知州看係邪教遂督領守城兵快出
城追捕隨卽拏獲羅金堂姜應策并審釋周加錫等四
十五名拏獲馬羸二十三匹白攢絲假印榜文三道白
紙假印告示二張銅印三顆日月補白甲一件綿甲一
十二件木雕小馬二匹木符二塊邪經教本共八冊大
青旗一枝旗杆二根五方黃旗四杆小白手旗二十二
枝大腰刀十把槍一枝手銃一杆長斧一把同棍棒等

物到州比劉明選張庚美方代等奔逃去訖餘黨知罪投水者約近百人隨蒙本州通詳申報其山沈真元又不合與方代劉仕高等同逃至地名南明鎮偶遇先在官今省釋地黨梁應受李仕亮等見得各犯行走慌忙盤獲劉仕高等一十三名并羸隻兇器衣具等物首赴潼川州審出前情隨卽具由通詳方代等仍行脫逃本月十七日選差官兵緝獲王時王霞等并劉明選見監母范氏及今監故妻何氏先在官今審釋僧人明正民張明齊等捺獲大紅圓領彩畫龍虎衣甲長旛門簾到

州卽具文申報隨蒙巡按薛御史牌行布政司會同按察司并巡西安綿守巡川北各道將政坤等三名審明招解加謹防禦地方蒙司轉行成都府提問間該本府查得妖犯一事節據綿州安縣羅江德陽各申報前來事出倡亂具由通詳蒙本院批按察司併確究首犯招解據綿州拏獲洪彩高應招郭貴并今故鄧尚聰監候聽審間又蒙督撫饒都御史憲牌看得姜應策等糾招羅江縣生員劉明選僞榜不經公然攻城茲雖就擒固天使投網脅從姑恕嚴飭解散仰道將已獲各犯究審

招詳又蒙本院於綿州申報詳內批據報妖賊聚衆僞
榜惑民甚至執械狂言殊可駭異卽應發兵剿捕第恐
波及無辜仰按察司會同都布二司查照行牌嚴飭該
管官司擒拏首惡審實招解餘黨悉行解散不得株連
良善安縣報警有無的據另詳速報儻聲勢重大該司
一面飛報本院以便相機剿捕毋致滋蔓仍通行隄防
僞榜併發又奉本院於按察司呈報拏獲王時詳內批
邪黨王時等僞造衣甲兇器榜文竝獲逆情已著仰按
察司速審招解內有株連無辜者先行釋放蒙司備牌

行府提問聞劉明選聞知緝拏卽奔投永寧逆酋奢崇
明父子部下僞爲軍師謀反潼川州差兵四路緝獲其
山法禹羅仕廣沈真元方代并前項馬匹衣刀又於未
獲王明懷家搽出抄寫妖書一本刊刻木符一件又於
未獲張應美家搽出刊刻妖書一本蒙州具由通詳蒙
巡按薛御史批據報拏獲劉仕高等及妖僧政坤等黨
與仰州審確招解其誤入者先行釋放又奉督撫饒都
御史批據報妖賊劉仕高等從邪聚衆驚擾地方殊可
駭異仰道查照另牌將見獲首惡速行審報但此妖黨

多係愚民誤入宜以解散爲主該道行州審明分別究
釋諭令悔過自新不得扳累仍行合屬一體防禦毋致
疎虞繳又蒙分守川北道紙牌行州蒙本州陳知州逐
名審據口詞分別收監釋放具由通詳蒙巡按薛御史
批據一二妖書該州審明解巡北道覆審解院其有從
之迹無從之心與從之從者卽次第開釋何以及盧氏
等數十餘口得非愚婦妄希福報者乎亟查確釋之總
期務守地方勿致牽累非辜可也又奉督撫饒都御史
批據報拏獲妖賊方代等百十餘人事干多命情真者

固有而株連者未必無也仰道查照前行牌詳速移住
綿州將各犯速審明白分別重輕宥釋招報仍行令各
屬加謹井示諭愚民省改安生繳又蒙帶管分守川北
道袁副使轉呈巡按薛御史批方代等該道審確首惡
招解其脅從者一面開釋蒙此隨蒙督撫饒都御史巡
按薛御史將其山等叅奉欽依轉行司道蒙道備行本
州審解間覃加齊劉仕高朱朝玉各陸續在監病故綿
州將王時等解至羅江縣地名大井舖丁真祥在彼病
故解府審問熊克真黎好各在監身故隨蒙本府馮知

府會同巡捕梁道判理刑羅推官審看得王時政坤俱與首惡劉明選及王進忠鼓惑煽亂結黨樹兵謀劫綿州庫藏爲地方一大變當被擒獲黃白旗尚在其手此二犯者實爲戎首擬絞何辭楊梧號爲大老祖范廷智助陣周文忠獲時有黃衣王偉以紅掛背榜均之亂民隨劉明選奔走者應以爲從口外爲民李尚續被誘執旗魏順拾旗刀於路張明清久持齋而受旗於張庚美張應美王霞爲進忠親父而與聞邪謀徒懲允宜若郭貴之木匠置器高應招之鐵匠打釘殊非戰具陶文脩

之觀會看佛陶廷友謾與同往徒自作孽法應深入而情實可憫末減各杖總之俗尚佛法一談白蓮無不疊聽津津喜而此一班愚民皆煽惑於劉明選與王進忠遂至殺身而不可救也按事論法必殺明選進忠方遏元謀而快衆念其餘洪彩輩且難與之同科則洪彩而下者可知矣今洪彩已服天刑政坤等各有定罪而明選進忠可終令漏網乎嚴緝得獲以正典刑各犯掛名者俱不窮究以免株連具招問覆查正犯劉明選未到各犯招稱俱未的確事關題請難以草草仰華陽縣

虛心再鞠招報魏順政坤在監各病故該本縣王知縣
看得王時等過聽妖人劉明選等所惑乃嘯聚鄉愚意
圖庫藏妄稱左道彌勒老祖之號以蠱平日持齋好佛
之人勢雖虛張祇以自斃今劉明選等未獲正罪而二
犯首論其亦何辭楊悟自尊老祖名色與周文忠王偉
擅穿紅服制亦異常皆係附和為各以從論不枉李
尚續張明清范廷智王霞或以持齋被誘自投縲紲之
中或以徇子無方釀成殺身之禍卽與之原情稍減不
為縱也他如木匠郭貴鐵匠高應招觀會之陶文脩陶

廷友各杖允宜其范氏何氏係首犯眷屬尚須羈候以
便緝結具招連人解府覆審蒙馮知府覆審看得王時
等隨劉明選主盟起事於吳加成家合謀於王進忠而
偽榜置自范廷仁家偽印造自熊克真手遂從洪仕祿
家內發足倡亂橫行聲言欲取附近州縣詎非叛逆情
形第綿州出城放砲曾不逾時卽行成擒閱其器械衣
服尚不逮街市演戲狀此豈真謀不軌者乎不過惑於
明選動雷亂言聚衆成羣吶喊鼓噪而罪已犯不赦今
政坤已繼洪彩病故固無別議王時等俱照原擬解詳

吳加成聽龍安府審結劉明選與王進忠洪仕祿併緝
正法又該本府署印重慶府余同知覆審相同將王時
問擬妄稱彌勒佛白蓮社明尊教左道亂正煽惑人民
爲首律絞王偉楊梧周文忠范廷智王霞張明清李尚
續俱依爲王時從律各杖一百流三千里免其徒杖發
口外爲民陶文脩陶廷友郭貴高應招各不應具招解
蒙按察司審批王時等倡爲邪教煽惑愚民至敢張榜
僞印公然稱亂似此無法之民奚道不赦之辟據審分
別首從姑開一面亦已得情本司面鞫各俛無辭第事

係奏請最宜詳慎仰府仍會同捕刑二官再一確審報
以便轉詳嚴提劉明遜等正罪毋使漏網繳蒙府緝拏
劉明遜問隨蒙分巡川北道牌行潼川州催審蒙陳知
州審得白蓮植黨頗多種禍不小未證菩提之果先張
殺伐之聲本州所獲劉仕高朱朝玉等已蒙天饒余遜
趙金順等已經審釋惟茲方代委係川北領袖他處供
亦有姓名在卷許其山又皆方代門下士其指麾聽之
法禹獲有衣馬然聲名不震蹤跡可疑大端此案必俟
諸犯會審面對質而後真贗易明出入不枉未可草草

按罪也具由解蒙按察司批仰州審確招解毋致枉縱
繳又蒙陳知州看得方代諸人止是潼川州犯而其事
實與劉明選同謀卽爲首爲從亦不過就中分首從而
合之劉明選又自有首從者非會審何以定罪臬司雖
發本州本州亦不敢偏聽擅決查按臺原送本道審奪
具由解蒙巡北道袁副使批仰州覆審分別首從具招
解奪速速蒙司查文內稱有劉仕高已經天僦余遜等
審釋且原疏擒獲妖賊共三十名茲該州僅解四名各
犯皆監斃皆審釋乎事干題覆必須一一聲說明白併

究招解又蒙陳知州看得白蓮爲教連結甚衆若非發覺就擒潼川幾不免矣是時陸續拏妖犯共八十五名口局內什九局外者什一其誤入法門者什九夥入謀叛者什一本州廉得其情仰遵憲檄釋去王明神李加孝等二十人已病故者六人情真送審四人一一明白若夫妄拏平民誤入平民故縱奸民皆所不敢也由報訖洪彩在綿州監病故羅仕廣張明清李尚續王時高應招王霞王偉楊梧法禹周文忠陶文脩范廷智郭貴陶廷友各在華陽縣陸續監故訖劉明選又改名李天

樞計令奢酋直衝成都攻圍不退見得防護堅密伊又計造旱船披髮仗劍攻打樓牆隨蒙諭令官兵焰銃勇擊劉明選以術得脫同奢酋逃入巢穴天啓二年正月解圍致蒙兩院具題訖又蒙分巡川北帶管守道閔叅政看得方代等四犯的係白蓮妖黨屢鞠情真毫無寬濫第業經具題似宜與政坤洪彩等併爲一招難分兩案具由呈詳督撫朱都御史奉批仰按察司覆審併招報又蒙巡按張御史批按察司併究確招解報蒙司牌行華陽縣審解方代在潼川州監染病解至中途身故

蒙王知縣審得妖犯一案在逃者以劉明選爲最而在
獲者以方代爲最次則異服之法禹等已有贓據可憑
皆法所不赦者然皆就天誅矣今惟許其山沈真元二
犯其從事邪教燃燈齋戒此卽自供亦爾擬以師巫之
律夫亦何辭但首犯俱死業足以正厥辜如二犯者贓
證俱無猶不可同語相應速配以省殘命將其山等仍
照原擬招解本司蒙司備牌行府查得各犯一發於綿
州一發於潼川兩案應合一招妖首劉明選在綿州供
爲羅江生員部院奏疏李天師卽應選方代又供爲劉

文選四案互異神奸詭譎以圖藏匿已經改正及將審
釋多名悉行刪削劉明選復隨奢賊臨陣戰關官兵奮
勇生擒押發按察司發府轉行成都縣審明選不合隱
下真情假供伊係張尚義乃瀘州人蒙許知府覆審看
得逆賊劉明選久懷不軌敢造彌天之孽妖術惑衆煽
亂幾徧巴山作奢賊軍師惡焰遂流井野真神人所共
憤而覆載所不容者也各犯初供旣變幻其姓字拏獲
明選尚敢隱匿其真名初審其口詞自供張尚義係瀘
州人爲奢賊搽山擄去授以監軍道僞銜調住延馬場

把守及奉憲批本府親審初猶不肯直認因喚府吏辨其聲音的係羅江人也又以母妻在獄至情動之遂涕泗交流因提其母范氏妻何氏相對而哽咽不能出聲直認爲劉明選矣此一賊者已犯大逆之條難同左道之律所當獻俘正法妻母緣坐者也許其山沈真元特爲明選所誘惑傳經演教附和爲非擬徒已足蔽辜矣王進忠等仍行緝結明選妻何氏於天啓三年十月初十日在華陽縣監病故結報訖將其山等招詳到司該本司李按察使看得許其山沈真元之獄已具原詳無

容復贅惟劉明選始而邪教惑人號爲活佛操戈鼓衆
殆欲攻城繼而事敗投畀稱爲軍師畫策領兵幾至危
國在前則爲戎首在後則爲罪魁叛逆通天卽移名改
姓何遜重僻家屬緣坐載在刑章但犯干獻俘罪難擅
擬合候明旨定奪將其山等轉呈罪犯二名口沈真元
年四十七歲係潼川州民范氏年七十一歲各招同議
得許其山沈真元俱各依妄稱彌勒佛白蓮等教左道
亂正之術燒香集衆夜聚曉散煽惑愚民爲從者律各
杖一百流三千里俱有大誥及遇蒙恩例通減二等各

杖九十徒二年半俱民審各有力候招詳允照例折納
米價贖罪完日寧家照出許其山沈真元民紙銀各一
錢又贖罪銀各一十五兩俱發潼川州追收貯庫類解
綿州見獲榜文旗幟等項潼川州見獲馬匹刀器查照
原招數目變價充餉取庫收繳報未獲王進忠張庚美
張應美洪仕祿王明懷分行綿州羅江潼川等州縣嚴
緝其劉明選已蒙解獻正法范氏係明選母仍行囑監
候明旨施行餘無照等因招詳到臣據此案照先准兵
部咨該四川巡撫陞任南京兵部饒侍郎題前事該本

部看得四川巡撫饒景暉題稱妖徒竊發於綿潼印錦之間聚衆張榜中有收元佛化及僞印僭殊亂形大著隨宜指縱旋報擒獲妖首政坤洪彩等百十餘人他皆逃散要行撫按衙門嚴加究審如律正罪并飭各屬將保甲之法著實修舉各一節爲照川省僻在西南山林險阻之間奸盜依憑且易於藏匿矧異端邪教一倡羣起愚氓迷於鼓惑地方深屬隱憂在昔有黃楠毛法等作亂旋亦撲滅今突出妖惡政坤洪彩等號招數百餘衆始而稱佛演法謬語空桑繼則糾黨聚徒恣爲妖孽

甚至張榜豎旗持兵挾刃悖逆之情形已著森嚴之國
法安容儻任其縱橫滋蔓流毒可勝言哉猶幸計早成
擒地方安堵若不重加鞫審正法無以警戒示懲旣經
具題前來相應覆請合候命下將妖徒政坤洪彩等行
四川撫按衙門嚴加究審如律正罪仍行各該道屬有
司等官查照先該撫臣題議嚴保甲之法奉有欽依事
理一體申飭欽遵著實舉行有虛文塞責者撫按官不
時叅奏處治等因覆奉聖旨是欽此又准兵部咨該四
川巡撫朱都御史題爲白蓮妖賊助賊蜂起恭報擒斬

功次併乞賜通行禁戢以弭禍亂事內將劉應選投賊誘叛攻城及合屬妖黨助賊爲亂情形題奉聖旨兵部知道欽此又該職方清吏司看得自昔左道流行未有不釀成大亂今四川各州縣妖賊繁興假白蓮之教爲不軌之謀或助賊爲亂或自立名號種種不法駭人聽聞若非撲滅之蚤則黃巾紅巾等禍復見於今日矣今元惡雖獲餘黨未除相應通行申飭以防將來未獲梅大等仍行該撫嚴行捕滅案呈到部備咨前來准此又准禮部咨爲外患剝膚內變接踵國勢日棘人心愈玩

懇乞聖明亟圖易轍改絃撥亂反治事該禮科給事中
李精白奏禁白蓮聞香紅蓮等教羅祖五部六冊經書
緣由該本部覆奉聖旨這妖教著行與兩京巡城官曉
諭解散經板盡行焚燬各省撫按官還督令有司盡心
禁戢務絕亂萌不得容縱欽此又准刑部咨爲妖黨猖
獗異常遐方困敝至極謹據實上聞懇祈聖明軫念以
脩防守以救然眉事該巡按四川監察御史薛敷政題
前事該本部會同都察院看得邪術惑人初爲託佛騙
財之局而揭竿糾衆遂成巨奸倡亂之階彼洪彩王時

等何物妖賊輒敢千百成羣公然嘯聚耶清平世界豈
容魑魅宵行就擒者所當依律典刑在逸者急宜嚴緝
正法既經撫按具題前來相應覆請恭候命下本部轉
行四川撫按衙門將洪彩等依律擬罪劉明選督捕嚴
緝務在必獲及修城實伍次第舉行等因題奉聖旨是
欽此又准禮部咨爲嚴禁左道以正人心以弭亂萌事
祠祭清吏司案呈照得白蓮紅封等教四川山東等處
已爲亂首若不通行嚴禁貽害匪細合咨嚴加禁緝解
散庶杜亂萌等因各備咨前來准此俱經通行司道將

已獲者究招未獲者緝捕去後今據招報到臣該臣會同巡按四川監察御史溫臯謨看得邪教之禍幾遍海內而蜀中各賊獨先發大難之端簡州邛州一帶則黃楠等首倡綿州潼川一帶則劉明選方代洪彩等勢更猖獗甚至僞榜爲印擅改僞號公然聚衆圍劫州城幸州衛官一時擒斬獨明選脫逃助賊倡亂今經擒解禍本已除其餘黨羽物故者多若許其山雖係同黨實非首惡姑以爲從擬徒亦足示懲矣明選母范氏年踰七十相應釋放至於原題所未及者如甘聰鄧胡萬明之

集衆千餘在城中謀爲內應南川之白僭臺等遠州之唐學等遂寧之宋宗吉等仁壽之梅子然等井研之管梁選等榮縣之劉孟奇等定遠之周之成等安岳大足之梅大等眉州之妖婦鍾氏燈黨白之行等合州之查茂良等江津之劉顯才等嘉定之劉可厚等重慶之鄒曰茂等遍布黨羽寔繁有徒所獲紙人紙甲併妖書僞檄等項皆誣罔大逆法所必誅臣等遵奉功令嚴行保甲皆隨起隨滅相繼戮誅人心亦已漸定虐焰自是可息矣旣經招詳前來理合具題伏乞勅下該部再加查

議覆請轉行臣等遵照發落施行爲此具本謹題請旨
天啓四年五月十三日上奉聖旨

武弁從賊疏

題爲武弁獻印從賊據實叅處以明國法事據兵巡下
川南道呈據瀘州申蒙本道紙牌奉臣紙牌照得瀘州
衛逼近酋穴掌印指揮盛應鳳當時曾否拒守何無二
字申報事寧尚無踪跡除會按院外擬合行查牌仰該
道官吏卽查本官是否聞變棄城逃藏有無獻印降賊
助逆爲害情狀印信見在何處逐查明確具由通詳以
憑叅題施行奉此又蒙巡按溫御史憲票行道卽將盛
應鳳投賊情由逐一究明叅罰詳院如見在管事卽便

革去另委蒙此俱經備行瀘州將盛應鳳情罪逐一究明詳道以便轉呈隨據該本州王知州散拘盛應鳳到官供稱見年三十三歲原籍南直隸徐州人始祖於洪武年間從征有功陞四川瀘州衛指揮僉事高曾祖父沿襲俱故應鳳襲授前職先年本衛設於瀘州城內後因九絲大壩夸叛蕩平之後將衛改設大壩與奢酋接壤萬曆二十五年應鳳襲授二十六年四月內到任管事後蒙考選軍政於天啓元年二月內奉文行委掌印至本年九月內奢酋謀叛突衝本衛應鳳見得暴兵卒

至慮恐攻城隨將衛印拴繫右脇自合飛報上司爲是不合不思兵寡難支集兵三百名至地名歡喜坡與賊對敵致將應鳳傷及多槍當將印信遺失無存止銅牌七面符驗一道見存原無從賊情由隨被賊破城擄掠人民於時應鳳奔逃伏草後同龔遊擊等官兵於天啓二年七月內恢復衛城招撫軍民復業向未管事并將集兵於歡喜坡對敵被傷失印緣由具狀投訴逐一查審明白取獲口詞在卷該本州知州王新民看得武弁世受國恩力捍禦靖封疆者上也不幸值封豕長蛇之

變智盡力竭之秋守旣不得死又不能揆時度勢亦有
無可奈何者在也盛應鳳孤城當虎穴之中螳臂支大
車之壓強弱不敵勝敗攸分勢也亦天也至今驗其周
身槍痕遍體據供失印歡喜情節甚慘旣無投賊之情
合依暴兵卒至欲來攻城反叛不卽申報發兵策應者
竝與擅發罪同律杖一百發邊遠充軍係軍官照例免
杖發邊方立功五年滿日還職仍於原衛所帶俸差操
之律叅照瀘州衛指揮盛應鳳叨膺世祿未練官箴遇
賊而不能審勢有警而弗速備申雖出暴異其罪奚辭

將應鳳叅詳到道該本道王按察使覆查看得瀘州衛之改設於永寧近地也正以防奢酋之出沒故凡值酋欲出必先該衛申請今崇明之變應鳳以掌印指揮畧無防備一時棄城而逃姑無論矣據稱印縛於脇何以脇在而印失也又何以銅牌七而符驗一張之又存也人言俱猷與酋而酋則止留其印蓋不虛耳况始而脇從猶可言也後酋入省城矣何以不出後酋進古蘭矣又何以不來而云天啓二年恢復衛城夫衛城乃復於三年非二年也其心事有不可言者矣如應鳳者坐以

從叛亦復何辭第時勢果有難處而子孫似屬無辜耳
姑發噤哨其子降襲庶後之爲世官者亦稍知有三尺
也等因通詳到臣該臣會同巡按四川監察御史溫臯
謨叅看得瀘州衛指揮僉事盛應鳳身膺城守罔顧官
常賊發無一字申明賊至經獻印求免事定之後方出
投見其爲從叛萬無疑者據訴被劄失印將誰欺乎旣
經該道審勘前來所當叅題正罪除批候題請明示外
理合具題伏乞勅下兵部覆議上請轉行巡按御史衙
門將盛應鳳提問正罪具奏施行爲此具本謹題請旨

天啓四年五月十三日上奉聖旨

塘報遵永功次

爲塘報遵永擒斬功次事自天啓四年二月初五日大兵到畢節獲功疏報後職檄鎮道令加銜叅將朱三鳳督兵五百鎮守羿子關及同木西海子何官等各圍洞降民熊樂榮等聯絡屯住截殺建功又檄監軍安綿道副使謝渭僉事劉可訓胡平表知府鄭朝棟總兵李維新將善後兵二萬五千分令各叅遊守等將一面修葺永城時出偏師或七千或五千循環出哨於畢節層臺羿子滑石之間逼近西界旁揜於龍場客仲箐洞之外

一使土苗知警一以探拏兩酋耀兵於西遵義道右布政使李仙品報陞偏沅巡撫要地逼近水西最爲要衝職飛檄僉事盧安世統所部兵一千馳赴綏桐會同同知冉崆商良弼推官李必達副將侯良柱陳一龍楊通霑等於二萬兵內揀選精銳爲前鋒各照分守大小婁山崖門青蛇栢楊朗山及烏江四十八渡信地宿兵戰守不時遠哨示威各取出兵功次月日結報又密行鎮烏各土司擒酋毋得容縱切責去後本年三月十一日起五月中止陸續據鎮道塘報據叅將范繼道報稱出

兵哨至海子據坐鎮朱三鳳塘報本月十六日巳時有賊數十過關早職卽率加銜守備陳士鳳各洞頭人熊樂榮等卽出截殺斬級五顆生擒二名供係水西前哨次日馬步數千圍洞二職陣殺八名何官寨加銜守備王黑兒殺死西兵唐阿年等七名生擒總抹色者翅各官同官兵及四洞降苗趕至陸家田壩三鳳直前殺賊九顆指揮劉起元等部斬十二顆官兵殺賊一百四十六顆生擒苗賊六名朱三鳳等又斬一十九顆部斬三十一顆生擒二苗鹽十一馱馬十二匹槍刀弩被六十

二件餘迹深箐研審活功稱係安邦彥點兵交奢寅往
毋亨接奢崇明不意撞遇天兵雄勇殺死寅賊心腹阿
額親信六十餘人身披白被白袍者卽是奢寅一聞砲
嚮先卽逃入山箐此時欲往鎮雄烏蒙平常往來水西
客仲朝夕不定父子或時亦不同居等情解報鎮道十
九日水賊者郎統兵報仇先攻劉華洞各洞同官兵追
殺又斬十八顆屢戰皆仗官兵出哨之力等情又據叅
將秦翼明塘報遵令督同郭起柱湯名楊世恩等及標
營盧世卿等兵數千復衝海子畢節分爲四隊一衝長

冲溝一衝過泥河與賊大戰斬功十一顆生擒一名馬
三匹牛二隻得獲赤水衛右千戶所百戶印二顆復轉
哨至廖官崖斬功數十生擒西苗沙車文會斬級二顆
加銜叅將盧世卿督兵至轉木灣斬壯功五顆俘獲苗
婦一名口槍弩三件牛二隻降將焦崇智等斬功十一
顆守備陳章招降猱獾三十餘家羅運龍李仁貴等斬
功二十顆生擒六名口槍刀弩絮等器二十五件牛十
一隻將官張學禮胡汝高哨至養馬寺對陣生擒僞都
司阿培等情又據林兆鼎范繼道塘報出兵至羿子等

處督同朱三鳳與西賊大戰斬功十二顆陳士鳳等斬級九顆守備馬先殺死西目以郎部斬苗級二十二顆趕至土母地界殺死土婦一口各等情塘報到職又據遵義路監紀盧僉事塘報奉令遠哨時出時沒林箐嶮巖去處張幟置砲揀選驍勇聽令截殺四月初三日據副將陳一龍差塘兵至鎮南關偵探飛報西目陳伏虎督兵萬餘要過清水橋去鄭家壩劫貴州李同知糧餉又清水坪鄉民甘時茂稟報相同本道卽刻公同各將分遣將官王尚明金文科駱麟等伏兵朗山口出五鳳

莊加銜叅將胡斯化將官晏可成等伏獅子山出散水
一枝伏鐵牌寺如遇賊敗奮力追殺又飛檄侯良柱發
兵出婁山速伏龍山寺中莊聽候截殺初四日據貴州
督餉同知李先登飛報賊抵緣塘河求援甚切本道會
同陳一龍遣先鋒庾朝榮李之印趙玉舟袁桂芳吳振
龍等將各率兵由冰山坎同知李瓊發將官蕭應珠由
打磨溪朱天祚出九杵俱至鄭家壩殺賊本道同李同
知陳一龍添兵防守綏陽聽候接應仍動支官銀懸賞
鼓舞至初五日黎明報稱賊將黔兵衝散放火燒糧我

兵適至銃砲震天降民姚月桂姚月槐先斬陳伏虎親家混名盧花子持首級馳報審驗真是壯功賞銀十兩將官吳振龍庾朝榮等各奮勇血戰斬功三十三顆箭傷銃打無筭擒獲生苗王明奪獲器械四十二件俘獲男婦六名口牛馬七隻匹先後懸賞花紅二十兩審王明供稱西賊在烏撒借兵欲攻綏桐永寧貴州分敵雲南大方每米一斗價銀六錢等情賊被官兵數次殺敗袁桂芳等趕至風香圍生擒頭目陳金虎小苗胡兒斬功一十五顆五鳳山獅子山錢牌寺各奮勇截殺三路

共斬四十二功奪獲刀槍器械二十六件牛馬三隻匹
部兵王一俊斬功一顆於身搜獲驗係貴州向叅議行
與李同知牌一張總兵魯欽報黔中兩院公文二角此
是西賊攻破黔營所得等情又據副將侯良柱塘報龍
山寺伏兵叅將陳鳳見賊奔逃奮威趕殺斬功六顆生
擒一名馬一匹弩槍三件中莊伏兵將官鄧朝用彭良
貴截斬苗級二十一顆奪馬三匹槍弩七件各等因塘
報到職該職看得兩逆最狡自分必死時居鎮雄毋享
或竄羿子水西往來莫測設法購擒出哨制西截殺戰

守務在得獲永路屢報擒斬西夸四百十二顆器械九十餘件遵路擒斬一百二十一顆器械七十八件將印信二顆併黔省向監軍魯總兵公文報解前來除功次行監紀道紀叙器械牛馬賞有功官兵印信候繳外理合塘報爲此合揭本部煩請案候事寧一體查叙施行天啓四年五月十三日右揭兵部

縣令病休疏

題爲縣官抱病情真亟請休致事據四川布政使司分
守川西道呈據成都府申奉本道紙牌奉臣批據該府
申據崇寧縣知縣張拱極呈稱卑職年踰七十血氣旣
衰邇來痰火大發遍身肌肉頭掉手足癱瘓不能動履
危在旦夕實難供職懇乞垂念老病日侵必無起色俯
賜轉達休致等因由詳奉批仰分守川西道查報奉此
又蒙巡按溫御史批同前事蒙批守西道查報蒙此俱
經備行成都府覆查去後今據回稱該知府許士奇看

得崇寧縣知縣張拱極夙有風痰之症兼以道路險遠
途次勞頓方履任以受事隨支離而難起浸致手足痿
痺卽欲慰留而縣令豈卧治之官哉相應准其致仕員
缺卽賜題補等因詳道該督糧帶管本道右布政使詹
爾達看得知縣張拱極夙疾盤根已苦熊夢赴任間關
益成顛纒值茲時事鞅掌安能以痿痺之軀卧理哉乞
休情殷應遂所請准令本官致仕回籍員缺請補等因
通詳到臣卷查先准吏部咨爲叅究府佐官員擅自回
籍以儆將來以肅臣節事內開外官告致自知縣以上

例應題請等因移咨前來通行遵照外今據前因該臣
會同巡按四川監察御史溫臯謨看得崇寧縣知縣張
拱極衰老龍鍾久病難痊告致情真實非假託旣經道
府查勘前來應合具題伏乞勅下吏部再加查議將知
縣張拱極准令致仕回籍員缺卽爲銓補嚴限前來任
事施行爲此具本謹題請旨天啓四年五月十三日上
奉聖旨

議留陞任將領疏

題爲議留陞任賢能將領莫安地方以愜輿論事據四川按察司呈奉臣批據建昌道呈據監理官及衛所各官士紳軍民保留叅將陳廷對加銜復任由詳該本道按察使張邦翼看得建南乃蜀中至緊邊塞而相嶺瀘沽等處尤商賈孔道亦苗獠出沒之數年來陳叅將奉本部院號令防守冕山自募健兒身先士卒往來瀘相之間遇賊便殺諸夸歛戢行旅無恐本道自成都以南遇有銅錫者卽問相嶺聲息其歸防護之力於陳叅將

者如出一口近本官因久陞粵西叅將且離地方瀘相苗賊一哨兩劫滇秦楚蜀商人躑躅越雋死不敢出南溪一步此本道所親聞見者則本官之去留係地方之安危亦明矣萬一夸氛日熾道路漸梗建之爲建尚忍言哉昔唐人謂大渡河之戍一不守則雅黎邛嘉皆擾是相嶺雖彈丸實建南之咽喉建南雖一隅實全蜀之門戶爲安建計非留本官不可爲留本官計非加副將職銜不可蓋本官題留叅將迄今已逾二年所卽副將亦應得之物况邊地勞苦猶宜破格優異乎至於本官

曾募親兵二百名未給糧餉隨從殺賊請乞具題加銜
留任令本官安位行志似不可一日緩者今據該廳衛
所各官師生軍民商賈合詞保留相應呈請乞將陳廷
對俯從題加副總職銜移駐越雋鎮守瀘相一帶等因
由詳奉批仰按察司會同布政司覆議詳報奉此又蒙
巡按溫御史批該本道呈同前事蒙批按察司會同布
政司覆議通詳繳蒙此隨經備移布政司會議去後隨
准照會回稱該本司左布政使林宰看得建南極邊苗
患匪細而相嶺瀘沽等處尤番獠出沒不常鎮壓將官

不可一日缺人今陞任叅將陳廷對標格瓊枝玉樹胸
中紫電青霜勇敵萬人材當一面醜夸出沒該叅常以
單騎突至麾所部驅之衆皆披靡行旅無阻賓至如歸
隱然窮徼一長城也加銜鎮守人地兩宜等因移司准
此該本司按察使李守俊看得建南爲全蜀肘腋相嶺
實建南咽喉滇黔商旅之通衢本省往還之要路向來
番猺縱橫遂致道路梗澀陳叅將奉文受事捐資召募
親冒矢石寨苗畏縮商民安堵穀擊肩摩不稱畏道皆
本官之力也一聞他轉兩省界民如失所恃官爲地方

留賢民爲桑梓借寇似宜准從合無將陳廷對題留加副總職銜移駐越雋鎮守相瀘一帶要隘等因由詳前來又據按察司呈奉臣批據本司呈爲傳奉事奉臣批據長史司呈奉蜀王令旨說與長史適留朔之期據五衛掌印指揮鎮撫千百戶經歷知事武舉官生三學生員四門鄉耆軍餘人等連本同詞共稱周都閩清廉博愛德政淪洽人心碩抱宏猷功業昭著西土予方念凋殘之後幸際賢明保障不惟深覆庇乎軍民抑且大有裨於藩府正欲藉表揚於兩臺豈意首掄推於部選第

念莅任未幾俄然喬轉官民失望激切交留頌聲盈庭情出一轍恁該司卽將所啓本呈備詳申達兩院司道惟希體念地方多故垂允輿論諄懇題加爵秩鎮寧蜀境官民攸賴藩封幸甚等因到司敬此敬遵案照先據成都五衛掌印指揮唐蓋劉安國何鼐李嗣裕宰邦璽等坐營守備徐之龍等操捕把總郭承勳等十四員二十二所掌印指揮薛之植等十九員武舉張紹武張希良耆老顧通等全啓爲保留賢能以安全蜀以實戎政事又據成都五衛看守西門城指揮千百戶陳光裕龔

孟龍邵宏等啟爲叩主恩從預留武弁以再撫育事又據五衛經歷知事齊以禮七員啓爲預留久任以裨仁政以重軍命事又據三學生員高廩易翼孔等并五衛官生張紹成等五十名啓爲爲國留賢以培邦本事又據四門看守門軍并五衛鄉耆劉繼昌等二千餘名訴爲懇天備達預留印主以益地方以快輿情事據等情遵奉前項令旨到司該本司左右長史曹大受母習吉看得當凋殘之後都闔寄戎之司嚴防守浚城渠治軍旅責良重也今觀五衛多官三學諸生及四門鄉耆等

保留周都闕呈詞累牘聯篇同舌共贊如所云胸藏萬
甲氣雄千軍則韓范之威名也禮遇僚屬延攬賓朋則
姬旦之吐握也革常規損紙贖行無票取則劉寵之清
也公聽斷嚴賞罰庭無留訟則穆公之才敏也他如賑
貧乏而給之糧米憫死亡而畀之棺衾雖發倉助麥之
仁慈不是過矣課應襲而俾閑弓馬督軍士而令熟韜
鈴卽嘗膽臥薪之勤苦其能尚乎種種善政不可縷數
誠哉千里之干城而一方之保障也乃莅任未盈一期
部臺已經陪點恐一旦喬轉則他邦之雨露一新而我

蜀之甘棠徒咏此官紳士庶所以同心而控之蜀主也
惟是蜀主正欲藉金湯以蔽藩屏又安得不轉而仰託
於本院乎伏乞俯順官民之請仰體睿上之意恩賜預
留久任昔韋臯節度西土郭進鎮守西山俱多歷年所
今獨不可倣而行之乎等因由詳奉批仰按察司查議
報奉此又蒙巡按溫御史批同前事蒙批周都闖一經
陪推士民遽爾合詞保留惟恐失之且致藩邸塵念可
稱民之司命國之于城矣按察司查議報蒙此該本司
看得四川都指揮使司掌印都司周官知勇足備文武

兼全恩威大洽衆心岷嶓侍爲保障官軍士民親藩蜀
府一聞別轉益切瞻依合詞請留非本官之賢能而能
得人若是似應留之久任以慰藩封而快輿情者也但
本官近雖有永寧之報恐尚未的合無俟其的報到日
代爲題請施行由詳奉批該閫推陞未有的據俟真報
到日議留未晚也如議行繳奉此又蒙巡按溫御史批
同前事蒙批周都閫陞轉未見邸報俟報日會議題留
繳蒙此遵照外續蒙按院憲牌照得四川掌印都司周
官望隆鎖鑰胸富甲兵誥戎壁壘改觀馭士恩威竝濟

誠將林之赤幟武庫之白眉也前以陪推叅將隨該蜀
藩士庶同聲預借具呈按察司詳請前來該本院批候
有的報至日會議題留今照本官業聞報轉合行議留
久任以安地方知會軍門外仰司呈堂行令該司照舊
任事料理屯政軍務練兵繕器保障會城該司仍查照
原詳會同布政司查議妥確通詳以憑會題蒙此備移
布政司查議隨准回稱該本司林左布政使看得都司
周官貌著鷹揚胸蟠豹畧任事有果毅之氣撫軍洽膠
纘之恩該司近報陞永寧叅將查永寧之衙門爲墟懷

材徒置之無用且軍前之效用已衆旅進亦等之投閑
省會重地似應以新銜管都司事其於詰戎兵而固金
湯實有裨益等因回覆到司在此又該本司李按察使
覆看得都司周官沉雄天賦機知風生分廿士卒傾心
傳令偏裨用命川西屏翰省會干城方今永寧諸將如
雲益之不足爲重會城寥寥虛弱去之不無可虞委應
議留以安重地旣經移會前來相應呈請合候會題以
新銜仍管該司印務藩封幸甚地方幸甚等因通詳到
臣據此爲照建昌叅將陳廷對掌印都司周官一以建

南相嶺滇道疏通番獮軍民相習畏服行旅無恐該道以乞賜題陞留鎮請一以省會保障修濠繕器官軍士庶及藩府以賢能二司以留任請臣豈不知爲地方留二官以安內攘外爲心然題留將領誠爲撫綏至計第恐冒侵撓之嫌二官不無抱維谷之嘆今准按臣會稿以永寧無叅將衙門無廩餼從役又有總鎮將領鎮其地而會城軍民殷殷保留若陳叅將不但建邊士民商旅該道詳懇卽滇中兩院士紳亦移書更切等因移會到臣該臣會同巡按四川監察御史溫臯謨看得建南

番獮跳梁爲害叵測而相嶺瀘沽一帶尤爲要害原任
建昌行都司僉書題加叅將照舊管事今改廣西永寧
叅將陳廷對韜略素裕保障有方自任事以來道路疏
通番獮畏避滇蜀行旅人人見德此真寒續儉粟不可
一日離地方者查得越雋原係總鎮駐劄之地自黃守
魁遇變之後兵戈倥傯一向虛位卽今藺土掃清大將
未能遽移合無以本官加陞副總兵駐劄越雋仍兼操
捕事務自會川起至大渡河止相沽一帶俱聽料理節
制一切地方苗情一併責成本官至於增置俸薪柴馬

門皂等項應用俱聽該道另議庶本官益感激思奮而
所裨危邊亦不細矣至於原任都司今陞叅將周官持
已水霜令寒刁斗錦官承亂之後緝奸訓練濬濠葺城
治器實伍勞瘁委屬不虛又能約已奉法不但衛所官
軍懇留情切卽藩王亦爲地方請留查本官之轉永寧
廩給供餼出自藺之土司隨從等項俱係雜流應役今
廓清草定無從編派衙宇煨燼銜位若虛合無姑候事
寧大將議更之後另爲請設叅將本官以新陞職銜仍
管都司事務誠有如按臣目擊時艱之確論也旣經該

司議詳前來理合具題伏乞勅下兵部再加查議覆請
將叅將陳廷對加陞副總兵職銜仍舊管理操捕事務
鎮守瀘州一帶其原陞廣西叅將員缺聽另推補周官
以新陞叅將職銜仍舊管理都司事務其原陞之缺俟
事平總兵更議之後另行推補庶於輿情地方大有裨
益矣謹題請旨天啓四年六月初八日上奉聖旨

司道援例請封疏

題爲皇恩未逮勞臣向隅懇乞援例代題以廣同仁以
隆孝治事據布政使司呈奉臣批據本司右布政新陞
偏沅巡撫李仙品左布政使閔夢得右布政使詹爾達
按察使李守俊張邦翼叅政王世仁吳光義叅九德副
使赫奕謝渭侯國張起鶚叅議來復僉事翁登彥錢時
劉可訓盧安世段師文胡平表呈稱天啓三年恭遇皇
長子誕生本年十二月二十八日接得恩詔內一款在
外方面官員五品以上歷俸二年者給與應得誥勅欽

此職等歷俸俱未及二年似與詔例未合天未遠臣何敢妄有陳乞維是人臣處多難之地則思致身以報國
人子際非常之遇則思邀榮以顯親雖鞠躬原非倖賞
而移孝實以作忠職等自赴蜀難以來同居患難之中
共竭犬馬之報或効死以守孤城或纓冠以興義旅或
收復郡邑橫身鋒鏑之場或轉戰疆場直搗虎狼之穴
或措糧置器嘔心血以供匝地之兵或嚼雪飧風窮鳥
道而挽登天之餉蓋三事俱空之國言戰言守俱爲巧
婦之炊九股側目之時居外居中盡屬貪狐之吻人人

鬚髮皆枯在在身家罔顧今幸金甌無缺又奉紫誥頒
來竊謂上可以報朝廷養士之恩下可以慰人子榮親
之念不虞俸不及期情爲例阻同患難者二十有二被
馳封者僅止兩人則是皇恩浩蕩之日草木皆霑而封
疆戮力之臣蓋帷獨靳雖鑒往轍者不欲濫與以傷恩
而鼓後效者不妨因勞以破例蓋居常則兩期不過一
瞬處變則一日可當三年此亦疾痛之所必呼而聖明
之所深隱者也查得貴州僉事李若楠等蒙彼處撫按
特題又蒙吏部議覆准給新銜誥勅兩省事同一體又

如守西道叅政戴燦以進表赴京自行陳請業已新銜准給伏乞俯鑒微勞特賜題請俾職等各以今銜叨給誥勅庶痛定思痛者可以忘勞而恩外霑恩者益思圖報矣等因由詳奉批仰布政司查報奉此又蒙巡按溫御史批同前事蒙批天末勞臣微恩成孝當亦聖明所不靳也黔例果否可援布政司查報蒙此該本司左布政使林宰查看得恩詔一款方面官員五品以上歷俸二年者給與應得詔勅蓋浩蕩之中有品節焉李仙品等歷俸尚淺誠與詔格未合但逆酋構釁絳難振古未

聞而各官効力宣勞此生罔愛議守議戰議剿卧薪膽
於鷓張豕突之時督兵督餉督夫焦頭額于瘴癘炎蒸
之地捐七尺以奏三捷摧陷廓清之力不敢言功出萬
死而幸一生艱危險阻之鄉委云盡瘁雖現在之筭俸
尚淺已不在歲計月計之常况前後之任事實多又非
止一朝一夕之故今者前星炳耀率土同歡身以及親
誰無烏烏之愛情爲格沮未徼綸綍之褒宜其嘆切於
向隅而情急於叩闕也查貴州僉事李若楠等撫按具
題吏部覆給現有例在可援本省叅政戴燦亦以新銜

得徼曠典各官同此危疆無分勞逸聖恩同此雨露豈有偏枯儻蒙代爲陳請准給誥勅在聖明稍推廣於格外之恩固爲因忠以教孝在各官得徼被於格外之寵益思移孝以作忠矣等因呈詳到臣該臣會同巡按四川監察御史溫臯謨議照皇恩浩蕩一物不遺烏鳥私衷更宜曲體有如布政使李仙品閔夢得等十九員歷俸雖有參差任事均殫勞瘁或躬冒矢石拚身家於不顧或督發轉運冒瘴癘而不辭是皆出萬死於一生較之優遊守俸者委屬霄壤今當犁庭掃穴之時適遇錫

類推恩之典例有可援情不能已內李仙品雖已陞轉未出蜀羈勞苦居先均當破格頒給以廣教孝勸忠之典者也既經該司覆議又有貴州畢節道僉事李若楠等及同官戴燥已經請給事例可援理合會題伏乞勅下吏部覆議上請將李仙品因夢得詹爾達李守俊張邦翼王世仁吳光義婁九德赫奕謝渭侯國張起鶚來復翁登彥錢時劉可訓盧安世段師文胡平表各照今任職銜給與應得誥命庶曠蕩洪恩遐邇通霑而諸臣得遂榮親至念將益堅報主永圖矣爲此具本謹題請

旨天啓四年六月初八日上奉聖旨

縣令給繇疏畧

題爲遵例考覈給繇官員事據四川布政使司呈奉臣
批據永川縣申准本縣知縣張堯揆關稱浙江杭州府
仁和縣人繇舉人云云呈乞照例會題并開具各稱職
考語起送到臣該臣會同巡按四川監察御史溫臯謨
考覈得永川縣知縣張堯揆才同斤運操凜霜嚴光明
備照逃亡擔荷力肩勞瘁本官職業俱修考居稱職除
批令帶俸管事及將前後歷任行過事蹟徑自造冊差
人齎繳五事冊揭行令咨送部院外查得永川縣印信

天啓元年九月內遭奢賊叛亂前官遺失見經請鑄未
頒該縣通詳兩院批允一應造報部院文冊俱借用巴
縣印信印鈐以防奸僞理合一併具題伏乞勅下吏部
將知縣張堯揆再加考覈酌議題覆施行爲此具本謹
題請旨天啓四年六月初八日上奉聖旨

六次請告疏

奏爲臣病沉篤萬難供職乞恩允放免代以無悞封疆
事臣至愚極陋無足比數仰荷皇上知遇二三年間恩
寵渥加卽肝腦塗地不足以報萬一乃不幸力小任重
福過災生二豎之祟漸入膏肓前五月初三日因控辭
未允力疾起拜新命方日夜會集道府酌議兵食計圖
購蜀寇而剪鄰氛汲汲孜孜不敢少寧乃六月初五日
甫退後署忽然暈絕門下官李必成等集醫馬士焯劉
嘉相等灌救藥俱不受至初六日天明始少甦而左手

左足俱不能動履蓋已成廢人矣夫臣子報主惟此一身今方疆場多故羣夸窺伺之秋猥以臥病不起之身濫司節鉞其何以肅號令而彰撻伐臣卽不懷性命之憂柰何可貽疆場之累年來蜀境已清二逆潛遁臣豈不欲勉強旦夕以倖成功而無柰病勢沉篤何也爲此披瀝上請萬非得已伏望皇上立賜休致速選才望委任仍乞憐臣病篤特准免代俾臣得尚存一息生出夔門仰戴高厚豈有窮期臣無任激切待命之至謹具奏聞伏候勅旨天啓四年六月十八日上奉聖旨

糾劾貪縱縣令疏

題爲糾劾貪縱縣令以肅法紀事蜀值兵火民困已極所賴二三有司撫摩參養何啻救焚拯溺有如太平縣知縣馬呈祥者僻處一方罔顧三尺任情肆志民怨難堪先是本官以三年考滿通詳給繇臣頗聞其穢且猖賊公然殘劫該縣麻子園地方事尚未結臣遂駁回覆覈而本官鼠量已盈狼貪無忌乖張繆戾道路駭聞儻俟計處不無留一日增民一日之害矣臣謹會同巡按四川監察御史溫臯謨將本官貪污顯跡爲皇上陳之

一本官縱子馬忠纓與腹快鄧九棟李詣開資緣爲奸
每日川堂傳報聽審犯人貧富因以索賄賄多則勝少
則誦無則拷打通邑怨之作爲歌謠太平知縣馬呈祥
信任腹快鄧天王通同公子開打點黎民大小受磨殃
一本縣所管三十六堡地產杉板虎皮香躋細茶花椒
黃連貝母熊掌香豬等物本官每年春季稟封官價差
鄧九棟馬茂翰等下鄉採買科取如值價十兩者止發
一兩上納後仍將官價繳還以上取買物件俱發大竹
河轉出漢中府發回家鄉每年約載數十船值價數百

兩賠納虎皮民徐應龍萬仕儒賠納杉板民白上珠胥
應龍賠納茶椒戶林起蛟陳希啓賠納香臍貝母民王
守禮官士達等證一本官喪妻後假以討奴婦爲名訪
得大竹河堡有客人陳大用久商不回其妻楊氏少而
有姿本官卽令該堡人陳希臯作媒發財禮銀三兩硬
妾入署子馬忠纓要收在房使喚本官要收做妾父子
相爭攘出川堂闔縣閱傳半月後乃將楊氏退出希臯
賠上財禮銀二十兩陳希臯陳啓龍證一本縣阜快民
兵一百二十名鼓手十二名本官侵剋工食止給一半

每名起白役二名差縱沿鄉嚇害趙九霄曾繼元等證
一本縣夫馬戶係里甲輪當每年一十二號本官先索
贖見每號六兩虎皮一張禮物一分外上坐馬一匹凡
遇迎接上司水手銀兩仍派衆馬戶代出六甲馬戶杜
棟等證一本縣縣門舖白沙舖石塘舖鐵礦舖司兵每
舖二名自本官上任以來諭令呈報大戶應當工食分
文不給計四舖共八名每年侵扣工食五十七兩六錢
張友富等證一本官訪查各鄉殷實之家每家封發銀
一兩取好麝子一隻送至縣堂仍令歆監快手餵養三

年約取過二百餘隻發回家鄉變價牛馬行白上珠證一本官徵收錢糧加二取羨私派侵漁歲得銀四百餘兩排年袁耀周德證一客人王甲打死龐奇本官公子得銀五十兩杉板一副竟自輕放後止罰罪一十八兩蒲遇時洪加明等證一排年侯之紀因會銀羨餘輕少本官故說比併錢糧卽時將之紀責三十板身死侯騰證一龐文仲因差人告拒捕拏縣將弟兄二人各責三十板罰罪各有力弟文廣罪銀無辦收監比併三次未及半月身死龐文仲證一賣茶小販史承光冉乾元等

其七人捕兵張萬拏送到縣各罰罪銀五兩四錢茶斤
追入後衙追罪不完將七命獄死監簿禁子證一本縣
寃民赴上告訴者拏回監禁打死史添祿因兵快酷害
削髮赴院告理本官差快拏回令賊犯攀摻即時打死
差人鄧九棟等證一本官新設防守坊長三十六名徑
自給賞冠帶每名索土儀香臍虎皮禮物二十四兩禮
厚者卽令川堂待茶免差間有禮薄者多遣苦差撿求
百端吹毛求疵陳希臯證本官以日暮途窮惟利是視
格外誅求無微不至且家政不肅官守貪婪自應照貪

例革職爲民者也伏乞勅下吏部再加查訪如果臣言不謬覆議上請將知縣馬呈祥照貪例革職爲民遺下員缺速行銓補庶貪邪之官少儆而於吏治民生亦裨矣爲此具本謹題請旨天啓四年六月十八日上奉

聖旨